

讀

書

叢

錄

讀書叢錄卷二十

臨海洪頤煊

百六三七

律歷志易九厄曰初入元百六陽九次三百七十四陰九頤煊案初入元百六歲後遇陽九卽有九年之災再三百七十四歲遇陰九又有九年之災路溫舒傳漢厄三七之間谷永傳當陽數之標季涉三七之節紀遭无妄之卦運直百六之災厄王莽傳深惟漢氏三七之厄又云陽九之厄旣度百六之會已過百六謂陽九三七卽陰九言三七者舉成數也

采詩夜誦

禮樂志乃立樂府采詩夜誦師古曰夜誦者其言辭
或秘不可宣露故於夜中歌誦也頤燼案下文以正
月上辛用事甘泉園丘使童男女俱歌昏祠至明故
樂府肄習禮儀亦在夜間

穀價貴賤

食貨志今一夫治田百畊歲收畊一石半爲粟百五
十石石三十頤燼案此言其平率也宣帝紀元康四
年比年豐穀石五錢趙充國傳金城湟中穀斛八錢
此言其賤食貨志元帝卽位齊地饑穀石三百餘民
多餓死馮奉世傳是歲時比不登京師穀石二百餘
邊郡四百關東五百四方饑饉此言其貴高帝紀關

中大饑米斛萬錢人相食食貨志漢興接秦之敝諸侯並起民失作業而大饑僅凡米石五千人相食死者過半王莽末年雒陽以東米石二千饑死者什七八此又非常之變矣

諸布諸嚴諸逐

郊祀志諸布諸嚴諸逐之屬百有餘廟師古曰諸布諸嚴諸逐未聞其義逐字或作逖頤煊案爾雅釋天祭星曰布釋詁逐病也史記封禪書作逖亦謂祈求以去病也嚴疑襄字之譌說文襄從衣𠄎聲與嚴形相近襄卽禳字之省

雍管

於杜亳有五杜主之祠壽星祠而雍管廟祠亦有杜
主韋昭曰亳音薄湯所都也臣瓚曰濟陰薄縣是也
李奇曰管茅也頤煊案管縣名地理志屬濟南郡

星傳

五行志劉向引星傳曰魁者貴人之牢又曰孛星見
北斗中大臣諸侯有受誅者又曰彗星入北斗有大
戰其流入北斗中得名人不入失名人又曰心大星
天王也其前星太子也後星庶子也頤煊案天文志
引夏氏日月傳曰日月食盡主位也不盡臣位也星
傳曰日者德也月者刑也此星傳疑亦夏氏所作

悼考廟

成帝建始元年正月乙丑皇考廟災初宣帝爲昭帝後而立父廟於禮不正頤煊案成帝紀建始元年春正月乙丑皇曾祖悼考廟災文穎曰宣帝父史皇孫廟此稱皇考廟是沿宣帝時舊名而史失改正

酒脯祀鼠

昭帝元鳳元年九月燕有黃鼠銜其尾舞於宮端門中往視之舞如故王使夫人以酒脯祀鼠舞不休頤煊案此事志凡兩見一作王使吏以酒脯祠鼠夫人疑卽吏字之譌

右內史

地理志右扶風武帝建元六年分爲右內史太初元

年更名主爵都尉爲右扶風師古曰主爵都尉至太
初元年更名右扶風而治於內史右地故此志追書
建元六年分爲右內史又云更名主爵都尉爲右扶
風頤煊案小顏說是也東方朔傳又詔中尉左右內
史表屬縣草田汲黯傳召爲主爵都尉公孫弘爲丞
相請徙黯爲右內史右內史者京兆尹也太初以前
右扶風未嘗名右內史觀百官公卿表可見

河上

太原郡廣武河主賈屋山在北頤煊案史記范雎列
傳昭王四十三年秦攻韓汾陘拔之因城河上廣武
索隱劉氏云此河上蓋近河北之地後漢書馬成傳

代杜茂繕治障塞自西河至渭橋河上至安邑此河
主當是河上之譌

慎陽

汝南郡慎陽師古曰慎字本作慎音真後誤爲慎闕
駟云永平五年失印更刻遂誤以水爲心頤煊案史
記功臣侯表索隱慎陽屬汝南如淳曰音慎若闕駟
合作順陽續漢書作慎陽據此闕駟謂誤以水爲心
是改順陽作慎陽川水形相近慎陽又慎陽之譌字
也後漢書黃憲傳汝南慎陽人李賢注南陽有慎陽
國而流俗書此作順陽者誤卽闕駟本

安陵

平原郡安侯國頤煊案水經河水注大河故瀆又北
逕修縣故城東又北逕安陵縣西本修之安陵鄉也
地理風俗記修縣東四十里有安陵鄉故縣也安下
疑脫陵字

建新

千乘郡莽曰建信頤煊案後漢書崔駰傳以篆爲建
新大尹孔僖傳及篆仕王莽爲建新大尹李賢注莽
改千乘國曰建信又改曰建新恩澤侯表陽新侯鄭
業哀帝紀杜鄴傳作陽信侯王莽傳是歲改十一公
號以新爲心又改心爲信故紀傳多不同

著

濟南郡著師古曰音竹庶反又音直庶反而韋昭誤以爲蒼龜之著乃音紀咨反失之遠矣頤煊案魏書地形志濟南郡著二漢晉屬此卽韋昭本

魚澤障

敦煌郡效穀本魚澤尉也桑欽說孝武元封六年濟南崔不意爲魚澤尉教力田以勤效得穀因立爲縣名頤煊案孫寶傳尙書僕射唐林左遷敦煌魚澤障候哀帝時魚澤障尙置官

魯屬徐州

魯國屬豫州頤煊案後漢郡國志魯國本屬徐州光武改屬豫州然則西漢魯國不屬豫州今本是後入

改也呂氏春秋有始覽泗上爲徐州魯也周秦間魯國亦當屬徐州

江水祠

廣陵國江都有江水祠頤煊案水經淮水注引應劭地理風俗記曰俗謂之伍相廟也後漢書張禹傳建初中拜揚州刺史當過江行郡中士民皆以江有子胥之神難於濟涉論衡書虛篇吳王夫差殺伍子胥乃以鴟夷橐投之於江今時會稽丹徒大江錢唐浙江皆立子胥之廟此皆以江水祠爲子胥之神

莽縣失注

王莽傳其以益歲以南付新平新平故淮陽蘇林曰

陳留圉縣莽改曰益歲志淮陽國圉縣下不注莽曰益歲又云以陳留以西付祈隧祈隧故滎陽志滎陽下不注莽曰祈隧後漢書馬援傳員時爲增山連率李賢注莽改上郡爲增山志亦不載

食封不在本邑

溝洫志是時武安侯田蚡爲丞相其奉邑食鄒頤煊案何武傳武封汜鄉侯食邑千戶汜鄉在琅邪不其哀帝初更以犖之博望鄉爲汜鄉侯國張湯傳封安世爲富平侯子延壽嗣侯國在陳留別邑在魏郡租歲入千餘萬史丹傳封丹爲武陽侯國東海鄒之武彊聚戶千一百師丹傳其以厚丘之中鄉戶二千一

百封丹爲義陽侯王莽傳封莽爲新都侯國南陽新野之都鄉千五百戶其食封皆不在本邑

段嘉

藝文志京氏段嘉十二篇晉灼曰儒林不見師古曰嘉卽京房所從受易者也見儒林傳及劉向別錄頤煊案儒林京房傳房授東海殷嘉河東姚平河南乘弘皆爲郎博士段殷字形相近

馮商

馮商所續太史公七篇韋昭曰馮商受詔續太史公十餘篇在班彪別錄商字子高師古曰七畧云商陽陵人治易事五鹿充宗後事劉向能屬文後與孟柳

俱待詔頗序列傳未卒病死頤煊案張湯傳贊馮商稱張湯之先與留侯同祖如淳曰班固目錄馮商長安人成帝時以能屬書待詔金馬門受詔續太史公書十餘篇趙廣漢傳贊馮商傳王尊張晏曰劉向作新序不道王尊馮商續史記爲作傳商書所見僅此班彪別錄班固目錄疑是一書或疑別錄是劉向別錄之譌非是

周史六改

周史六改六篇師古曰卽今之六韜也頤煊案莊子徐無鬼篇金版六改釋文引司馬崔云金版六改皆周書篇名是周史又可稱周書也史記蘇秦列傳得

周書陰符伏而讀之影宋本北堂書鈔引六韜稱周書或稱周書陰符皆其證

老萊子

老萊子十六篇楚人與孔子同時頤煊案老萊子見大戴禮衛將軍文子篇史記仲尼弟子列傳序云孔子之所嚴事於周則老子於楚則老萊子太史公以老萊子亦與孔子同時故附見於老子傳中禮記曾子問引老聃云當是適周問禮之老子莊子天運篇孔子行年五十有一而不聞道乃南之沛見老聃沛地屬楚疑是老萊子也

五子胥

雜家五子胥八篇兵技巧家五子胥十篇圖二卷頤
煊案武帝紀臣瓚曰伍子胥書有戈船又曰伍子胥
書有下瀨船此當在兵技巧家十篇中史記正義引
七錄云越絕十六卷或云伍子胥撰藝文志無越絕
疑卽雜家之五子胥八篇後人并爲一故文選七命
李善注引越絕書伍子胥水戰兵法一條太平御覽
卷三百一十五引越絕書伍子胥水戰法一條引五
子胥書皆以越絕冠之今本越絕無水戰法又篇次
錯亂以末篇證之越絕本八篇太伯一荆平二吳三
計倪四請糴五九術六兵法七陳恒八與雜家五子
胥篇數正同

書有細注

藝文志細注皆班固自注史通補注篇云趙歧之三
輔決錄陳壽之季漢輔臣周處之陽羨土風常璩之
華陽士女文言美辭列於章句委曲敘事存於細書
魏書張淵觀象賦注文選月賦李善注引作淵自注

臨濟

項籍傳初章邯既殺齊王田儋於臨菑師古曰高紀
及儋傳並言於臨濟此獨言臨菑疑此誤也頤煊案
田儋傳狄人也秦將章邯圍魏王咎於臨濟急魏王
請救於齊儋將兵救魏章邯夜銜枚擊大破齊楚軍
殺儋於臨濟下後漢郡國志陳留郡平丘有臨濟亭

田儵死此史記正義因安帝改狄爲臨濟謂田儵卽死於狄非是

項它

羽使兄子項它爲大將龍且爲裨將救齊韓信破殺龍且師古曰高紀云項聲此傳云項它紀傳不同未知孰是頤煊案項聲項它是二人高帝紀楚使項聲龍且攻布在三年冬十一月此使項它龍且救齊在四年冬十月非一時事

遁逃

贊秦人開關延敵九國之師遁巡而不敢進師古曰遁巡謂疑懼而卻退也流俗書本巡字誤作逃讀者

因之而爲遁逃之義潘岳西征賦云逃遁以奔竄斯亦誤矣頤煊案文選過秦論作九國之師遁逃而不敢進史記作逡巡遁逃而不敢進西征賦作逃遁未爲誤也

舍人

張耳傳有廝養卒謝其舍曰師古曰謝其舍謂告其舍中人也故下言舍中人皆笑今流俗書本於此舍下輒加人字非也頤煊案史記索隱所見漢書本作舍人曹參傳告舍人趣治行韓信傳其舍人得罪信舍人亦小史之屬此舍下義當有人字

壁人

貫高等乃壁人柏人要之置廁文穎曰置人廁壁中以伺高祖史記索隱引張晏曰鑿壁空之令人止中也頤煊案壁者軍壘之名項籍傳諸侯軍救鉅鹿者十餘壁莫敢縱兵及楚擊秦諸侯皆從壁上觀韓信傳候趙空壁逐利卽馳入趙壁皆是廁與次同謂伏兵於柏人而別置次以待宿

韓說

韓王信傳媯弟說以校尉擊匈奴封龍頤侯後坐酎金失侯復以待詔爲橫海將軍擊破東越封按道侯師古曰史記年表并衛青傳載韓說初封龍頤侯後爲按道侯皆與此傳同而漢書功臣表龍頤侯名諲

按道侯名說列爲二人與此不同疑表誤頤煊案表
饒卽說字之譌小顏不察而反爲饒字作音失其旨
矣

秦漢印小

韓信傳至使人有功當封爵刻印矧忍不能予蘇林
曰矧音矧角之矧矧與搏同手弄角訛不忍授也頤
煊案矧與玩同謂玩弄不忍授酈食其傳爲人刻印
玩而不能授卽其證秦漢印小故可玩弄於手周昌
傳高祖持御史大夫印弄之嚴助傳陛下以方寸之
印丈二之組填撫方外後漢書徐璆傳送前所假汝
南東海二郡印綬璆曰昔蘇武不墜七尺之節况此

方寸印乎皇甫規傳可不煩方寸之印應劭漢官儀
曰孝武皇帝元狩四年令通官印五分今世所得秦
漢印皆如此

嚙然

諸將皆嚙然陽應曰諾孟康曰嚙音撫不精明也頤
煊案嚙與憮同三蒼憮怪愕之詞後漢書禰衡傳表
憮然爲駭李賢注憮然怪之也論語微子夫子憮然
曰皇侃疏憮然猶驚愕也

賜越將軍印

彭越傳齊王田榮叛項王漢乃使人賜越將軍印使
下濟陰以擊楚頤煊案高帝紀時彭越在鉅野衆萬

人無所屬榮與越將軍印因令反梁地越擊殺濟北
王安項籍傳榮怒自立爲齊王予彭越將軍印令反
梁地越迺擊殺濟北王田安田榮遂并王三齊之地
是與越將軍印者齊王田榮非漢也漢字後人妄加
削東海薛郡

楚元王傳王戊稍淫暴二十年爲薄太后服私姦削
東海薛郡頤熒案吳王濞傳錯因言楚王戊往年爲
薄太后服私姦服舍請誅之詔赦削東海郡而不及
薛此時薛郡已省故不言

治淮南獄

更生父德武帝時治淮南獄錢氏大昕攷異淮南王

安以謀反誅事在元狩元年此傳言昭帝卽位德待
詔丞相府年三十餘當淮南獄起之時恐德尙未生
安得預治獄之列頤煊案淮南王傳丞相弘廷尉湯
等以聞上使宗正以符節治王未至安自刑殺公卿
表元狩元年宗正劉受受沈猷侯歲子更生之從祖
父也

平陽侯

齊悼惠王傳會漢將欒布平陽侯等兵至齊師古曰
平陽侯曹襄頤煊案史記素隱云曹奇功臣表平陽
孝文後四年簡侯奇嗣七年薨孝景四年夷侯時嗣
元狩六年共侯襄嗣孝景三年平陽侯當是曹奇小

顏誤

徒跣免冠

蕭何傳何年老素恭謹徒跣入謝頤煊案凡謝罪皆
免冠黃霸傳尚書令受丞相對霸免冠謝罪霍光傳
光入免冠頓首謝朱雲傳左將軍辛慶忌免冠解印
綬叩頭殿下其重者始徒跣匡衡傳衡免冠徒跣待
罪申屠嘉傳通至丞相府免冠徒跣謝皆是

東垣

曹參傳追至東垣生獲魏王豹頤煊案地理志河東
郡垣縣卽東垣也史記曹相國世家作追至武垣正
義地理志武垣屬涿郡誤韓信傳從夏陽以木罌缶

渡軍襲安邑魏王豹驚引兵迎信信遂虜豹與此傳不同

講若畫一

講若畫一文穎曰講或作較師古曰講和也畫一言整齊也頤煊案文選西都賦李善注引作較若畫一史記曹相國世家作顛若畫一說文斛平斗斛也從斗莠聲講顛皆斛字之借與較字通用

圮上

張良傳良嘗閒從容步游下邳圮上服虔曰圮音頤楚人謂橋曰圮應劭曰汜水之上也文穎曰沂水上橋也師古曰下邳之水非汜水也又非沂水頤煊案

後漢郡國志補注戴延之西征記曰下邳有沂水自
城西西南注泗別下迴城南亦注泗舊有橋張良與
黃石公會此橋水經沂水注沂水於下邳縣北西流
分爲二水一水於城北西南入泗一水逕城東屈從
縣南亦注泗謂之小沂水水上有橋徐泗間以爲圯
昔張子房遇黃石公於圯上卽此處也皆同文穎說
諸將盡謹

陳平傳是日拜平爲都尉使參乘典護軍諸將盡謹
師古曰謹躡而議也頤煊案史記陳丞相世家索隱
漢書作皆怨今本作盡謹是後人據史記改

褚

周勃傳文帝擇勃子賢者皆推亞夫迺封爲條侯師古曰縣在渤海地理志作菑字其音同耳頤煊案地理志脩師古曰音條屬信都國後漢郡國志修屬勃海郡

蓋侯

亞夫果餓死後上迺封王信爲蓋侯頤煊案景帝紀後元年條侯周亞夫下獄死恩澤侯表蓋侯王信景帝中五年五月甲戌封在亞夫未死前二年

圍都尉

樊噲傳後攻圍都尉東郡守尉於城武師古曰圍卽陳留圍縣頤煊案史記樊噲列傳作從攻圍東郡守

尉於成武高帝紀沛公攻破東郡尉於成武周勃傳
攻東郡尉於成武破之曹參傳其後從攻東郡尉軍
破之成武南灌嬰傳從擊破東郡尉於成武皆不及
圍都尉此時無都尉之名又當稱郡不稱縣圍是圍
字之譌都尉涉下郡尉而衍

柴將軍

因擊韓信軍於參合所將卒斬韓信頤煊案高帝紀
十一年將軍柴武斬韓王信於參合韓王信傳十一
年春信復與胡騎入居參合漢使柴將軍擊之柴將
軍屠參合斬信是時柴將軍屬樊噲所將卒卽武也

面雍樹馳

夏侯嬰傳嬰常收載行而雍樹馳服虔曰高祖欲斬之故嬰圍樹走面向樹也應劭曰古者立乘因恐小兒墮墜各置一面雍持之樹立也蘇林曰南方人謂抱小兒爲雍樹面者以面首向臨之也頤煊案面背也雍抱也樹與豎同謂反縛雍豎於背而馳也

平陽

灌嬰傳下下邳壽春擊破楚騎平陽遂降彭城師古曰此平陽在東郡頤煊案地理志東郡有陽平而無平陽泰山郡有東平陽山陽郡有南平陽此與下邳彭城近當是南平陽

期期

周昌傳臣口不能言然臣心期期知其不可陛下欲廢太子臣期期不奉詔師古曰以口吃故每重言期期頤煊案期急言讀與極同方言極吃也下文極知其左遷趙禹傳極知禹無害荀子王霸篇目欲綦色耳欲綦聲楊倞注綦極也皆與期字義同

高陽

酈食其傳陳留高陽人也爲里監門頤煊案陳留此時未置郡言陳留者是舉其縣也故下文云夫陳留天下之衝四通五達之郊也臣知其令梁孝王傳梁北至泰山西至高陽是高陽初屬梁後屬淮陽圍至後漢屬陳留郡

魯元公主

婁敬傳呂后泣曰妾唯以一太子一女奈何棄之匈奴頤煊案高帝紀呂后生孝惠帝魯元公主張耳傳五年耳薨子敖嗣尙高祖長女魯元公主爲王后七年高祖從平城過趙趙王旦暮自上食體甚卑有子婿禮敬此言在七年後是時魯元公主已尙張敖敬安得爲此言

短衣

叔孫通傳通儒服漢王憎之迺變其服短衣楚製頤煊案蓋寬饒傳斷其禪衣令短離地朱博傳又敕功曹官屬多褻衣大袪不中節度自今掾史衣皆令去

地三寸文帝紀所幸慎夫人衣不曳地王莽傳母病公卿列侯遣夫人問疾莽妻迎之衣不曳地是時男女禮服尙長故短者特言之

漢儀

徙通爲奉常定宗廟儀法及稍定漢諸儀法皆通所論著也頤煊案禮樂志今叔孫通所撰禮儀與律令同錄臧於理官法家又復不傳漢典寢而不著民臣莫有言者後漢書曹褒傳章和元年正月乃召褒詣嘉德門令小黃門持班固所上叔孫通漢儀十二篇勅褒曰此制散略多不合經今宜依禮條正使可施行王充論衡謝短篇高祖詔叔孫通制作儀品十六

篇視班固所上增加四篇

大夫但

淮南王傳大夫但張晏曰大夫姓也上云男子但明其本姓大夫也如淳曰但大夫名也頤煊案功臣表德侯景建以長安大夫從莽通共殺如侯得少傳石德侯劉屈氂傳作長安男子男子通稱大夫未知其審

輿地圖

日夜與左吳等按輿地圖部署兵所從入頤煊案嚴助傳以地圖察其山川要塞相去不過寸數匡衡傳初衡封僮之安樂鄉郡圖誤以閩佰爲平陵佰後漢

書鄧禹傳光武舍城樓上披輿地圖指示禹曰天下郡國如是今始乃得其一子其圖當與今制相同亦所在有之

如周丘

衡山王傳王日夜求壯士如周丘等師古曰下邳人吳王反時請得漢節下下邳者頤煊案小顏說非是吳王濞傳周丘者下邳人破城陽中尉軍聞吳王敗走卽引兵歸下邳未至癰發背死此當別是一人如姓周丘名

中大夫

直不疑傳稍遷至中大夫錢氏大昕攷異公卿表景

帝中六年中大夫令直不疑更爲衛尉此傳脫令字
頤煊案史記直不疑傳作文帝稱舉稍遷至大中大
夫集解引漢書亦作大中大夫今本中上脫大字不
疑文帝時爲大中大夫景帝時爲中大夫令非一時
事

張敞

張敞傳至武帝元朔中代韓安國爲御史大夫頤煊
案公卿表建元六年大農令韓安國爲御史大夫四
年病免元光四年九月中尉張敞爲御史大夫元朔
當是元光之譌

睢陽太守

梁平王傳元朔中睢陽人犴反人辱其父而與睢陽太守客俱出同車犴反殺其仇車上亡去睢陽太守怒以讓梁二千石頤煊案睢陽梁國都終漢世未嘗置郡史記梁孝王世家作淮陽太守元朔中淮陽置郡今傳兩言睢陽太守皆當是淮陽之譌

左內史

鼂錯傳景帝卽位以錯爲內史內史府居太上廟塹中門東出不便錯乃穿門南出鑿廟塹垣頤煊案三輔黃圖三輔治所馮翊在故城內太上皇廟西南地理志太初元年分左內史爲左馮翊是錯爲內史者左內史也公卿表孝景元年中大夫鼂錯爲左內史

一年遷

王恬啟

張釋之傳中尉條侯周亞夫與梁相山都侯王恬咸見釋之持議平迺結爲親友頤煊案史記張釋之列傳作山都侯王恬開集解漢書作啓啓者景帝諱也故或爲開今本啟作咸屬下句讀是後人所改

衽服

鄒陽傳武力鼎士衽服叢臺之下者一旦成市師古曰衽服盛服也頤煊案淮南齊俗訓尸祝衽衽高誘注衽黑齋衣也左氏僖五年傳均服振振服虔注衽服黑服也衽衽同色皆爲兵士之服梁丘賀傳宣子

章夜立服入廟居郎間執戟立廟門文選豪士賦序
李善注引漢書作袷服袷立字通用

中庶子蒙

故秦皇帝任中庶子蒙之言以信荆軻而匕首竊發
師古曰蒙者庶子名也今流俗書本蒙下輒加恬字
非也頤煊案文選鄒陽獄中上書作蒙嘉史記國策
俱云荆軻因中庶子蒙嘉而見秦王唯燕丹子作中
庶子蒙與小顏本同

山邑丞

路溫舒傳舉孝廉爲山邑丞蘇林曰縣名在常山晉
灼曰地理志常山有石邑無山邑師古曰山邑不知

其處今流俗書本云常山石邑丞後人妄加石字耳
頤煊案蘇林本必有石字故注云在常山晉灼本已
訛脫

讀書叢錄卷二十一

太后稱東宮

田蚡傳趙綰請母奏事東宮竇太后大怒頤煊案夏侯勝傳霍光以爲羣臣奏事東宮太后省政宜知經術淳于長傳趣白東宮莽求見太后孝文竇皇后傳太后崩遺詔盡以東宮金錢財物賜長公主嫖孝成許皇后傳皇后其孝東宮母闕朔望師古曰東宮太后所居漢制天子居未央宮太后居長樂宮長樂在未央東故太后稱東宮

丞相蚡薨

灌夫傳五年十月悉論灌夫支屬頤煊案鄭當時傳
爲右內史以武安魏其時議貶秩爲詹事公卿表建
元四年江都相鄭當時爲右內史五年貶爲詹事則
武安魏其事當在元光二年上文元光四年當是二
年之譌此五年當作三年丞相蚡以四年春薨與武
帝紀公卿表恩澤侯表年月悉合

抱兒

李廣傳暫騰而上胡兒馬因抱兒鞭馬南馳頤煊案
史記三代世表抱之山中集解抱音普茅反抱卽拋
字李將軍列傳作因推墮兒卽拋字義杖乘傳譬猶
抱薪而救火也抱義亦作拋

白檀

乃召拜廣爲右北平太守又云將軍其率師東轅彌節白檀孟康曰白檀縣名也屬右北平頓煊案地理志白檀屬漁陽郡當是後所改屬

民母

衛青傳民母之子皆奴畜之服虔曰民母嫡母也師古曰言鄭季正妻本在編戶之間以別於公主家也今流俗書本云先母之子頓煊案史記衛青列傳作先母之子集解服虔曰先母適妻也服虔本作先母或作民母皆注家依本書改之惠帝紀賜民爵戶一級昭帝紀賜中二千石及天下民爵民母有爵者之

妻

附傳

霍去病傳其裨將及校尉侯者九人爲特將者十五人李廣張騫公孫賀李蔡曹襄韓說蘇建皆自有傳頤煊案李蔡附見李廣傳曹襄附見曹參傳韓說附見韓王信傳凡漢書有附見於各傳者其姓名皆當推此例特表而出之

歲持若蓀

司馬相如傳歲持若蓀師古曰持當爲苻字之誤耳苻鬼目也今流俗本持字或作橙非也頤煊案文選李善注韋昭曰持音懲此本爲橙字作音後人改從

持字史記司馬相如列傳亦作橙郭璞曰橙柚也姚氏以爲此前後皆草非橙也小顏襲其說因改其字望幸蓋

設壇場望幸蓋號以况榮頤煊案史記司馬相如列傳同索隱云本或作望華蓋而孟康服虔注本皆幸下有華字摯虞流別集則唯云望幸後人見幸下有蓋字又幸字似華故因疑惑遂定華字使誤也影宋北堂書鈔卷九十一引漢書作望華蓋與索隱所見本同

菑川薛

公孫弘傳菑川薛人也史記正義菑川國都劇薛屬

魯國薛與劇隔交州及泰山未詳頤煊案此薛是鄉
聚名或暫時所置縣如陳平傳陽武戶牖鄉人酈食
其傳陳留高陽人路溫舒傳鉅鹿東里人東方朔傳
平原厭次人田叔傳趙陘城人王式傳東平新桃人
皆不見於地理志漢書本有此例

遂

有功者上無功者下則羣臣遂李奇曰言有次第也
頤煊案詩清廟駿奔走在廟禮記大傳鄭注引作遂
爾雅釋詁駿速也謂賞罰明則臣下趨事疾速而有
功

東閣

於是起客館開東閣以延賢人師古曰閣者小門也
東向開之避當庭門而引賓客以別於掾史官屬也
頤煊案孫寶傳明府素著威名今不敢取穉季當且
闔閣勿有所問王尊傳直符史詣閣下從太守受其
事雋不疑傳不疑盛服至門上謁吏白勝之勝之開
閣延請凡單言閣者皆聽事之正門言東閣者所以
別於正門

乾沒

張湯傳始爲小吏乾沒與長安富賈田甲魚翁叔之
屬交私服虔曰乾沒射成敗也如淳曰豫居物以待
之得利爲乾失利爲沒頤煊案乾沒卽幹末二字之

借言所幹末務卽所謂逐什一之利也晉書潘岳傳其母數誚讓之曰爾當知足而乾没不已乎三國志傅嘏傳豈敢傾根竭本寄命洪流以徼乾没乎皆其義

挈令

受而著讞法廷尉挈令韋昭曰在板挈也師古曰獄訟之要也書於讞法挈令以爲後式也頤煊案挈古通作契字挈令謂刻之於板著以爲令溝洫志今內史稻田租挈重說文絺字注樂浪挈令織皆是

富平

封安世爲富平侯子延壽旣嗣侯國在陳留別邑在

魏郡租入歲千餘萬數上書讓減戶邑廼徙封平原并一國戶口如故而租稅減半頤煊案水經潔水注商河又東北逕富平縣故城北闕駟曰本車騎將軍張安世之封邑酈氏以爲非引陳留風俗傳曰陳留尉氏縣安陵鄉故富平縣也是乃安世所食矣地理志富平屬平原郡陳留郡無富平縣疑陳留郡本有富平縣後移治平原漢志據改後而言故陳留郡下不書

太官獻丞

勃舉太官獻丞陳湯蘇林曰獻丞主貢獻物也頤煊案陳湯傳西至長安求官得太官獻食丞此傳獻下

脫食字

敬武公主

臨尚敬武公主文穎曰成帝姊也臣瓚曰敬武公主是元帝姊也師古曰薛宣傳云主怒曰嫂何以取妹殺之既謂元后爲嫂是則元帝妹也頤煊案敬武公主有二趙充國傳孫欽尚敬武公主主無子薛宣傳初宣後封爲侯時妻死而敬武公主寡居上令宣尚焉以恩澤侯表攷之張臨以竟寧元年薨趙欽以陽朔二年薨薛宣後封爲侯在永始二年此傳云臨薨子放嗣放以公主子開敏得幸放爲天水屬國都尉永始元延間比年日蝕故久不還居歲餘放歸第視

母公主疾數月主有瘳據此則趙欽所尙之敬武公主非張臨所尙之敬武公主明甚當是欽所尙者後改尙宣爲王莽所殺

桑衛昆弟子

杜周傳周中廢後爲執金吾逐捕桑弘羊衛皇后昆弟子刻深上以爲盡力無私遷爲御史大夫頤煊公卿表天漢二年故廷尉杜周爲執金吾一年遷三年二月執金吾杜周爲御史大夫四年卒衛皇后之敗在征和二年桑弘羊伏誅在元鳳元年皆在周卒後武帝紀天漢元年秋閉城門大搜二年秋大搜臣瓚曰搜謂索姦人也晉灼曰搜巫蠱也或其時桑衛昆

弟子有連其內者

合陽侯

合陽侯梁放舉欽齊氏召南曰漢代列侯具見於表此合陽侯梁放功臣恩澤二表不見何也師古亦無注頤煊案功臣表合陽愛侯梁喜元康四年二月壬午封四十一年薨建始二年侯放嗣卽其人

道家

司馬遷傳乃論六家之要指頤煊案下文陰陽儒墨名法道德謂之六家道家兼言德故老子稱道德經以母姓爲別

戾太子傳納史良娣產子男進號曰史皇孫張晏曰

皆以舅氏姓爲氏以相別也頤煊案臨江王栗姬所
生因號栗太子館陶公主竇太后所生因號竇太主
皆是

衛伉

及皇后弟子長平侯衛伉皆坐誅頤煊案表傳衛伉
時已免侯其坐巫蠱死事表傳俱不載牧丘侯石德
爲太子少傅坐巫蠱死事表傳亦不載

令狐茂

壺關三老茂上書師古曰荀悅漢紀云令狐茂班史
不載其姓不知於何得也頤煊案後漢書張皓傳李
賢注云太子死後壺關三老令狐茂上書訟太子寃

見前書疑漢書舊本有令狐姓小顏所見本偶脫耳
今本荀悅漢紀無令狐茂三字

燕屬縣

燕刺王傳後坐臧匿亡命削良鄉安次文安三縣頤
煊案地理志良鄉屬涿郡安次文安屬勃海郡又下
女使人祠葭水台水晉灼曰葭水在廣平南和台水
在鴈門當日燕王所封不止廣陽四縣

太尉田蚡

嚴助傳建元三年閩越舉兵圍東甌東甌告急於漢
時武帝年未二十以問太尉田蚡蚡頤煊案武帝紀建
元二年冬十月太尉蚡免田蚡傳蚡以侯家居雖不

任職以王太后故親幸數言事此其證矣

衛將軍

主父偃傳元光元年廼西入關見衛將軍師古曰衛青頤煊案衛青傳子夫爲夫人青爲大中大夫元光六年拜爲車騎將軍擊匈奴是時青尙未爲將軍

景駒舉郢

嚴安傳景駒舉郢頤煊案陳勝傳勝初立時凌人秦嘉等皆特起將兵圍東海守於郟秦嘉等聞勝軍敗廼立景駒爲楚王郢當是郟字之譌

臚鮑

東方朔傳譬猶臚鮑之襲狗服虔曰音縱劬如淳曰

鼯鼯小鼠也音精劬頤煊案爾雅釋獸鼯鼠郭璞注
小鼯鼯也亦名鼯鼯此服音所本

君侯

劉屈氂傳願君侯早請昌邑王爲太子如淳曰漢儀
注列侯爲丞相稱君侯師古曰楊惲傳丘常謂惲爲
君侯是則通呼列侯之尊稱耳非必在於丞相也頤
煊案蓋寬饒傳許伯入第寬饒叩視屋而歎曰君侯
可不戒哉馮野王傳綏和中封王舅參爲宜鄉侯以
列侯奉朝請丞相翟方進數謂君侯以王舅見廢此
皆列侯通稱君侯之證

故安昌侯

朱雲傳至成帝時丞相故安昌侯張禹劉歆曰故字當在丞相上禹時罷相侯如故也頤煊案恩澤侯表安昌侯張禹河平四年以丞相侯至鴻嘉四年免相以薛宣代之時未免相亦未免侯下文上問誰也對曰安昌侯張禹此故字當是衍文

九九

梅福傳臣聞齊桓之時有以九九見者師古曰九九算術若今九章五曹之輩頤煊案管子輕重戊篇處戲造六筮以迎陰陽作九九之數以合天道魏劉徽九章算術序昔在庖犧氏作九九之術以合六爻之變神仙傳古人貴九九之好善鳴吠之技皆謂算術

延壽

霍光傳執金吾臣延壽師古曰李延壽頤煊案公卿表元鳳五年沛國太守李壽爲執金吾元平元年執金吾延壽延壽與李壽當是二人孝元初元三年丞相司直南郡李延壽子惠爲執金吾更非是

京兆尹

左馮翊臣廣明右扶風臣德頤煊案此奏三輔無京兆尹趙廣漢傳遷京輔都尉守京兆尹會昭帝崩廣漢以與議定策賜爵關內侯時趙廣漢以京輔都尉守京兆尹兼官故不書

太夫人

金曰碑傳欽與族昆弟稔侯當俱封當母南卽莽母
功顯君同產弟也當上南大行爲太夫人甄邯劾奏
失禮不敬頤煊案文帝紀如淳曰列侯之妻稱夫人
列侯死子復爲列侯乃得稱太夫人子不爲列侯不
得稱也當是賞弟建之孫紹賞封其父未爲列侯不
得稱太夫人故甄邯以爲失禮不敬

拜光祿大夫

常惠傳昭帝時廼還漢嘉其勤勞拜爲光祿大夫頤
煊案蘇武傳常惠徐聖趙終根皆拜爲中郎賜帛各
二百匹

許伯

疏廣傳太子外祖父特進平恩侯許伯頤煊案蓋寬
饒傳平恩侯許伯八第恩澤侯表及外戚許皇后傳
俱作平恩侯許廣漢伯當是其字

王陽

王吉傳字子陽頤煊案下文東家有樹王陽婦去王
陽在位貢禹彈冠俗傳王陽能作黃金龔遂傳唯遂
與中尉王陽以數諫爭得減死王尊傳先是琅邪王
陽爲益州刺史皆以字行

冠石山

睦弘傳孝昭元鳳三年正月泰山萊蕪山南匈匈有
數千人聲民視之有大石自立頤煊案劉向傳孝昭

帝時冠石立於泰山晉灼曰漢注冠石山名地理志
冠石山在泰山郡南武陽不在萊蕪與眭弘傳異

張孺

李尋傳與張孺鄭寬中同師齊氏召南曰孺字誤也
據儒林傳張山拊事小夏侯建授同縣李尋鄭寬中
少君山陽張無故子儒此文張孺卽張無故而舉其
字當云張子儒傳寫之譌遂合兩字爲孺字耳頤煊
案王吉字子陽稱王陽張禹字子文稱張文漢書本
有此例孺儒古字通用

三輔稱官

趙廣漢傳還爲吾謝界上亭長京兆不忘卿厚意頤

煊案薛宣傳高陵令陽湛貪猾不遜宣自牒湛曰馮
翊敬重令朱博傳馮翊欲洒卿恥蕭育傳扶風怒曰
君課第六裁自脫楊敞傳郎中丘常謂憚曰聞君侯
訟韓馮翊當得活乎三輔皆稱官

王遵

王尊傳字子贛涿郡高陽人也頤煊案潘岳西征賦
李善注張景陽雜詩李善注引漢書皆作王遵公卿
表守京輔都尉王遵爲京兆尹尊遵古字通用

非蕭何後

蕭望之傳東海蘭陵人也師古曰近代譜牒妄相託
附乃云望之蕭何之後追次昭穆流俗學者共祖述

焉頤煊案南齊書本紀新唐書宰相世系表皆以望
之爲蕭何六世孫潛夫論志姓氏篇相國蕭何封鄴
侯本沛人今長陵蕭其後也前將軍蕭望之東海人
杜陵蕭其後也二蕭不同系此其明證

同郡不同縣

治齊詩事同縣后倉且十年頤煊案后蒼傳東海郟
人也同郡而不同縣

張譚

匡衡傳至成帝初卽位衡迺與御史大夫甄譚共奏
顯頤煊案王尊傳初中書謁者令石顯貴幸丞相匡
衡御史大夫張譚皆阿附畏事顯元帝崩成帝初卽

位衡譚乃奏顯舊惡公卿表建昭三年匡衡爲丞相
竟寧元年張譚爲御史大夫此作甄譚誤

丞相衡免

司隸校尉駿少府忠行廷尉事劾奏衡錢氏大昕攷
異公卿表衡以建始三年十二月免相而張忠爲少
府在建始四年不應有劾衡事免相時廷尉則何壽
也頤煊案恩澤侯表樂安侯匡衡建始四年坐顯地
盜土免王商傳建始三年秋京師民無故驚言大水
至明年商代匡衡爲丞相衡免相當在建始四年此
是公卿表誤

春秋嚴氏

馬宮傳治春秋嚴氏頤煊案儒林傳顏安樂授淮陽
冷豐次君豐授馬宮宮至大司徒自有傳宮所治春
秋是顏氏學

舉者

薛宣傳欲遣吏考案恐負舉者恥辱儒士師古曰游
本因薦舉得官而身又是儒者故云然頤煊案游受
罪恐累及所舉之人卽今所謂罪坐舉主也陳湯傳
富平侯張勃舉湯司隸奏湯無循行勃選舉故不以
實坐削二百戶何武傳坐舉方正所舉者召見槃辟
雅拜有司以爲詭衆虛僞坐左遷楚內史皆其證

遺我寶龜

翟方進傳天降威遺我寶龜固知我國有眚災師古
曰言天所以降威遺龜者知國有災病頤煊案以尙
書大誥證之遺我寶龜四字當涉上文而行

濮陽無鹽

惟信義等始發自濮陽結姦無鹽頤煊案翟義爲東
郡太守舉兵并東平立東平王雲子信爲天子濮陽
東郡治無鹽東平治皆西漢郡治在第一縣之證

會稽東部都尉

揚雄傳東南一尉孟康曰會稽東部都尉也頤煊案
地理志會稽郡錢塘注西部都尉治回浦注南部都
尉治而無東部都尉越絕書漢文帝前九年會稽并

故鄣郡太守治故鄣都尉治山陰前十六年太守治
吳郡都尉錢塘此西部都尉也三國志虞翻傳注元
鼎五年立東部都尉後徙章安陽朔二年又徙治鄞
或有寇害復徙句章宋書州郡志臨海太守本會稽
東部都尉前漢都尉治鄞後漢分會稽爲吳郡疑是
都尉徙治章安此東部都尉也晉太康記章安本鄞
縣南之回浦鄉地理志南部是東部之譌

解嘲文

惟寂寞自投閣爰清靜作符命師古曰以雄解嘲之
言譏之今流俗本云惟寂惟寞自投于閣爰清爰靜
作符命頤煊案解嘲文爰清爰靜游神之庭惟寂惟

莫守德之宅文選謝靈運齋中讀書詩李善注引漢書惟寂惟寞自投于閣皆與流俗本同

毛莫如

施讎傳魯伯授太山毛莫如少路莫如至常山太守
顧煊案杜欽傳遣使者毛莫如先考驗卒得其姦李
尋傳賀良等反道惑衆皆下獄光祿勳平當光祿大
夫毛莫如與御史中丞廷尉雜治卽其人

霍氏外孫

梁丘賀傳是時霍氏外孫代郡太守任宣坐謀反誅
師古曰霍光傳云任宣霍氏之婿此云外孫誤也頤
煊案霍光傳光薨太中大夫任宣與侍御史五人持

節護喪事又云禹故長史任宣候問禹又云太中大夫任宣爲代郡太守並不言霍氏之婿光次婿任勝宣或是勝子也

梁丘臨

臨代五鹿充宗爲少府頤煊案公卿表建昭元年尙書令五鹿充宗爲少府五年貶爲玄菟太守竟寧元年河南太守召信臣爲少府是代五鹿充宗爲少府者召信臣非梁丘臨臨爲少府公卿表不載

丘蓋

王氏傳疑者丘蓋不言蘇林曰丘蓋不言不知之意也如淳曰齊俗以不知爲丘臨煊案文選陳孔璋爲

曹洪與魏文書恐猶未信丘言廣雅丘空也法言問神篇酒誥之篇俄空焉蓋者發語辭空蓋不言亦闕疑之意

太守異秩

循吏傳序孝宣以爲太守吏民之本故二千石有治理效輒以璽書勉厲增秩賜金或爵至關內侯頤煊案宣帝紀膠東相成治有異等其秩成中二千石賜爵關內侯潁川太守黃霸以治行尤異秩中二千石賜爵關內侯王尊傳遷東郡太守制詔秩尊中二千石孫寶傳拜爲廣漢太守秩中二千石西南夷傳陳立爲巴郡太守秩中二千石賜爵左庶長京房傳元

帝以房爲魏郡太守秩八百石黃霸傳有詔歸潁川太守官以八百石居皆異秩也

太守稱將

嚴延年傳爲涿郡太守遣掾蠡吾趙繡按高氏得其死罪繡見延年新將師古曰新爲郡將也謂郡守謂郡將者以其兼領武事也頤煊案尹翁歸傳徵拜東海太守廷尉于定國乃謂邑子曰此賢將汝不任事也皆謂太守爲將也

荅布

貨殖傳荅布皮革干石孟康曰荅布白疊也師古曰荅者重厚之貌而讀者妄爲榻音非也頤煊案史記

貨殖列傳作榻布齊民要術卷七引漢書亦作榻布
千石

歸德侯

陳遵傳更始至長安大臣薦遵爲大司馬護軍與歸
德侯劉颯俱使匈奴頤熿案恩澤侯表陽城繆侯劉
德居攝元年侯颯嗣王莽敗絕此歸德侯當是更始
所封後漢書南匈奴傳光武六年始令歸德侯劉颯
使匈奴與此不同

東粵地遂虛

閩粵王傳於是天子曰東粵陔多阻閩粵悍數反覆
詔軍吏皆將其民徙處江淮之間東粵地遂虛頤熿

案武帝紀元封元年詔曰東越險阻反覆爲後世患
遷其民於江淮間遂虛其地而不及閩粵傳漢五年
復立無諸爲閩粵王王閩中故地都冶朱買臣傳故
東越王居保泉山今聞東越王更徙處南行去泉山
五百里地理志會稽郡有冶縣而無泉山此亦當日
僅虛東粵而不及閩粵之證

公主封邑名同

孝文竇皇后傳女爲館陶長公主東方朔傳初帝姑
館陶公主號竇太主堂邑侯驪_牛尚之此文帝女也
于定國傳子永尚館陶公主施施者宣帝長女成帝
姑也孝景王皇后傳皇后長女爲平陽公主衛青傳

平陽侯曹壽尙武帝姊陽信長公主而平陽侯曹壽有惡疾就國上廼詔青尙平陽主如淳曰本陽信長公主爲平陽侯所尙故稱平陽主此景帝女也中山衛姬傳長女又爲元帝婕妤生平陽公主此元帝女也夏侯嬰傳曾孫頗尙平陽公主表在元鼎二年又當是武帝之女皆公主封邑名同敬武公主有二已見前

后年十五

孝昭上官皇后傳皇后立十歲而昭帝崩后年十四五云頤煊案昭帝紀始元四年春三月甲寅立皇后上官氏此傳云立爲皇后年甫六歲昭帝崩時后年

十五四字當衍

下妻

王莽傳不知何一男子遮臣建車前自稱漢氏劉子
與成帝下妻子也師古曰下妻猶言小妻頤熒案小
妻者妾也下妻非小妻後漢書光武紀建武七年詔
吏人遭饑亂及爲青徐賊所掠爲奴婢下妻欲去留
者恣聽之十三年詔益州民或依託爲下妻欲去者
恣聽之說文孀一曰下妻也下妻非妾王昌傳郎緣
是詐稱真子輿云母故成帝謳者亦非妾屬

漢書述

敘傳其敘曰師古曰自皇矣漢祖以下諸敘皆班固

自論撰漢書意此亦依放史記之敘目耳後之學者
不曉此爲漢書敘目見有述字因謂此文追述漢書
之事乃呼爲漢書述失之遠矣摯虞尙有此惑其餘
曷足怪乎頤煊案文選李善注引皆作漢書述